

Concelleiros e concelleiras, secretaria do Concello, veciñas e veciños, familiares, amigas e amigos: permitídemme en primeiro lugar agradecer a vosa presenza neste solemne acto de constitución da nova Corporación Municipal.

Felicítamos a todos os veciños e veciñas de Lourenzá que o día 24 de maio, cunha asistencia masiva ás urnas, máis dun 80%, deron unha lección de responsabilidade democrática. O pobo falou, decidindo darlle un apoio maioritario á candidatura do PSdeG-PSOE, que eu tiven a honra de encabezar.

Permitídemme, antes de nada, agradecer publicamente o traballo de todos os compañeiros e compañeiras que formaron parte da candidatura socialista e de todas as persoas que colaboraron con nós durante a campaña electoral. Teño que dicir que sen o seu traballo, o seu apoio e a súa amizade hoxe non sería alcaldesa de Lourenzá. Sei que poderei contar sempre con todos vós. Moitas grazas.

Quero facer tamén unha especial mención á miña familia en concreto, que me apoiou ó longo de todo este camiño, e en especial ao meu pai, que é sen dúbida o meu referente como persoa e o exemplo de bondade e honestidade que sempre me guía en cada paso que dou na miña vida.

Teño que agradecer tamén a unhas persoas que hai catro anos entraron a formar parte da miña vida. Unhas persoas que hai 4 anos me abriron as portas da súa casa e me acolleron cos brazos abertos como se fose unha filla. A esas persoas, Ana e Andrés, e Ariana, que hoxe non está aquí, douvos as grazas publicamente por todo o voso cariño, a vosa comprensión comigo e por todas e cada unha das mostras de afecto que tedes comigo. Sabedes que para min sodes como uns pais, e que estea onde estea sempre vos levarei no corazón.

Teño que pedirilles perdón ás nosas familias polo tempo de dedicación que lles roubamos e tamén pedirilles paciencia no futuro polo tempo que lles imos roubar. Esforzaremos para non desatendervos e poder compaxinar a vida privada e familiar coa vida pública e de servizo aos cidadáns.

Quero tamén dar as grazas ó anterior equipo de goberno, a anterior alcaldesa, Enma, a Dino, a Vidal, a Lupe, a Pablo e a Toto.....Grazas por estes anos de traballo e dedicación e por todas as cousas que conseguistes para Lourenzá.

É para min un gran honor ser a primeira alcaldesa socialista da historia de Lourenzá. Pero non quero pasar á historia deste Concello só por iso. Quero ser a alcaldesa de todos e de todas, quero ser a alcaldesa da participación e da transparencia. Quero ser unha alcaldesa próxima ó pobo, quero ser a alcaldesa AMIGA. Quero seguir sendo a mesma persoa que fun ata hoxe, a vosa veciña, a vosa amiga, a que fala con vós na rúa, a que vos escoita, unha veciña máis... Simplemente esa persoa que os veciños escollestes para que vos represente a vós e a Lourenzá, pero esa persoa que nunca esquecerá de onde veu. E se algún día me desvío deste camiño, compañeiros e compañeiras, veciños e veciñas, facédemo saber, non dubidedes en dicirme que estou equivocada e que ese camiño non é o correcto, porque eu, sen dúbida, vos estarei agradecida.

Hoxe quero comprometerme aquí e tender a miña man aos grupos políticos da oposición. Dende aquí agradeceremos e apoiaremos todas aquelas propostas e iniciativas que redunden en beneficio dos nosos veciños e veciñas.

Para rematar quero ter un recordo especial para todos os compañeiros e compañeiras que nos precederon como representantes socialistas nas anteriores corporacións. Eles tamén son os responsables de que hoxe teñamos unha alcaldesa socialista. Este recordo é máis especial para aqueles e aquelas que xa non están con nós e que alá onde estean seguro que se sentirán felices e orgullosos.

Quero tamén recordar aquí a recente desaparición dun concelleiro exemplar, Pedro Zerolo, loitador incansable a favor dos dereitos sociais e da liberdade. Un político honrado que coa súa palabra foi capaz de facer revolución social. Un exemplo sen dúbida a seguir por todo nós.

Non me vou estender máis, hoxe é un día de celebración, pero o luns xa estarei, xa estaremos todos traballando no Concello e á vosa enteira disposición.

Non quero despedirme sen antes dicirvos que estou aquí para traballar con ganas, con ilusión, con esforzo e que sen dúbida farei todo o que estea ao meu alcance para conseguir o mellor para Lourenzá. Espero facelo todo o mellor posible para todos vós e non decepcionarvos.

Moitísimas grazas a todos e a todas por compartir comigo este momento e estar presentes neste acto de constitución da nova corporación municipal e facer que o día de hoxe sexa inesquecible para min e para a historia do Concello de Lourenzá.